

四庫全書

史部

欽定四庫全書

金石文攷畧卷八

嘉興李光暎撰

集王右軍書聖教序記

此碑為百代書法模楷今時尤重搨者無虛日風骨
鏗鏘俱無存者形似耳然其筆法隱然可尋余曾見
舊搨十數本獨長安一田生本為善今已為按察僉
事劉公餘澤索去餘皆不及也余所收本乃二十年

前物較之今搨猶勝真可寶惜

石墨鶴華

書苑云唐文皇製聖教序時都城諸釋諉弘福寺懷仁集右軍行書勒石累年方就逸少真跡咸萃其中今觀碑中字與右軍遺帖所有者纖微克肖書苑之說信然然近世翰林侍書輩多學此碑學弗能至了無高韻因是目其書為院體由唐吳通微昆弟已有斯目故今士大夫玩此者絕少然學弗至者自俗耳碑中字未嘗俗也非深於書者不足以語此政和四

年四月長曆書

東觀餘論

聖教序雖沙門懷仁所集書然從高宗內府借右軍行筆摹出備極八法之妙真墨池之龍象蘭亭之羽翼也余平生所見凡數十百本無踰於此者其波拂鈎磔處與真跡無兩當是唐時搨本耳去歲嘉平臘得此本今年伏中復得定武蘭亭為自快自賞者久之窮措大餘生一何多幸耶

聖教序未裂本予往往得之多為人乞去而留其頗

佳者此亦其一也懷仁既善書又從文皇借得真跡摹出以故雖不無偏旁轉合而不失意他集右軍書者未盡爾也

二條古今法書苑載王世貞說

世之所以重藏序非重懷仁也以右軍之精神在也右軍之精神一寄於石而懷仁即可以為世寶則夫古搨之全者一筆一畫右軍之遺意與懷仁寤寐追維之極思一舉而收之豈非千古之尤物學此道者所當以頂踵奉之者哉

墨林快事

懷仁真跡在余家一紀餘未嘗展觀今乃臨石本政如漢元殺毛延壽

每以懷仁聖教序書有蹊徑不甚臨仿欲用虞永興法為之方於碑刻習氣有異此冊亦其一也苦不能竟耳

古人摹書用硬黃自運用絹素此卷首有宋徽宗金書縹字與內景經同一黃素知為懷仁一筆自書無疑書苑所云雜取碑字右軍劇迹咸萃其中非也黃

長睿書家董狐亦以書苑為據恨其不見真跡輒隨人言下轉耳

此書視陝碑特為姿媚唐時稱為小王書若非懷仁自運即不當命之小王也吾家有宋舍利塔碑云習右軍書集之為習正合余因此自信有會

四條容臺集

集右軍書聖教序心經予前後閱數十本獨此舊搨本不失筆意最佳耳此序為唐文皇記為高宗作今以冠藏經蓋敘記僧玄奘求法事也始奘於武德末

乞往西佛地取經不許乃私從一賈胡關出邊亡何
胡棄之去幾死獨身越五烽謁高昌王傳致西突厥
可汗歷十餘國而抵鳩摩從胡僧戒賢習大乘論譯
經語又之中天天竺戒日王所說法積十八年而以
二象馱夾經像還至涼州上聞手詔飛騎迎之令安
夏阿蘭若譯經行世而父子相率為序記侈大之噫
彼高宗者固耳豈文皇之雄畧豪氣而遂衰沮不振
至此耶彼其志得而無所事事意倦而感慨係之不

之於長生則之於因果無足怪也裴旻托之文皇懷
仁又託之右軍以不朽其業即令達磨師見之不滿
一笑耳右軍真跡固多第自禊帖外不應行法大小
勻整乃爾且梵字多所不備其小小展縮偏傍轉合
所不免也

聖教序書法為百代楷模病之者第謂其結體無別
構偏傍多假借蓋集書不得不爾仲蔚謂出文皇手
又經于志寧等潤色不無失真是不知咸亨中沙門

懷仁模集勒石而心經末有志寧等潤色題字蓋玄
奘方於洛中總譯西域所齎經藏以志寧等領其事
故云爾唐世宰相有兼譯經潤文使者即其職也凡
唐藏經卷尾皆有諸公名姓此何與於書而仲蔚乃
以是病之陋一至此乎展冊為之失笑

二條
人稿
奔州山

王弘撰曰序中如金容掩色心經中色不異空空
無色諸色字於草法合至空不異色色即是空空即
是色無色聲香味觸法諸色字乃包字集書者誤以

此作色耳觀天地苞乎陰陽苞字下體文抱風雲之
潤抱字右邊自見而昔無言及之者

金石文字記

懷仁聖教序乃集右軍書宋人極薄之呼為院體院
中人習以書誥勅士大夫不學也趙子固云其中逸
筆不知懷仁從何處取入使人未學他書先學此殊
為可惡子固深於書學者故其言如此至近時乃大
不然視此帖不斷本如懷寶收藏家學與不學俱購
求一本以侈人而秦中士夫為甚有著金石史者謂

聖教序較定武蘭亭相絕千里可為噴飯真所謂夜
郎王不知漢大彼或未見真定武耳蘭亭是右軍第
一妙跡定武是蘭亭第一妙本不特此也即宋所臨
諸本無不各具一風格陸子淵所謂原本既高得其
一枝半節無不善者人能學一分即得一分之力無
不卓然大雅惟一學聖教序則渾身板俗即唐人吳
通微號能書者亦受此累況其他乎黃長睿云學勿
能至自俗碑字未嘗俗夫碑字不俗何以學之輒俗

使學蘭亭者有是乎長曆深於書學者失言矣余初
得一不斷本繼於故內復得此本更完好字法纖毫
畢具蓋唐搨也秦人王文含見之歎不釋手

銷夏記

按董文敏容臺別集云云聖教序是懷仁書矣懷仁
既奉勅書宜云僧懷仁奉勅書何駕名右軍若奉勅
集右軍書又不得自書文敏言懷仁真跡在其家恐
未必是真跡即使是真跡當是懷仁集書之後另書
豈可據此疑集書原本耶沈文恪跋所臨蘭亭後序

云古人集字之工如出一手他帖不多見唯聖教序
及此序耳董宗伯謂懷仁乃右軍後裔習其祖之筆
法流傳既久遂以習為集不知何所攷據則文敏所
言懷仁真跡文恪亦不以此為據也

光暎識

慈恩寺鴈塢褚河南書聖教序記

褚河南書本學逸少而能自成家法然疎瘦勁鍊又
似西漢往往不減銅籀等書故非後世所能及也昔
逸少所受書法有謂多骨微肉者筋書多肉微骨者

墨猪多力豐筋者聖無力無筋者病河南豈所謂瘦

硬通神者耶

廣川書跋

此以序與記分刻二碑於慈恩寺墻下分東西兩龕
置之風雨與童牧俱不能及是以能久而不毀書法
適健然用筆輕細後署永徽四年書似不及同州本

石墨鵠華

此長安本也筆法老幹簡勁有不可屈之色而形態
朴野似以貧賤驕人者可敬而不可狎造其妙可以

高揖貴人而學之未至覺粗直可憎蓋喜甘惡苦所

從來矣

墨林快事

三藏聖教序世傳二本予嘗評之以為王書如千狐
聚裘痕跡俱無褚書如孤蠶吐絲文章具在然今藏
書之家右軍之刻多有而中書之搨僅見簡翁此帙
紙墨兩精原溥可以保矣

蒼潤軒帖跋

趙岫曰據張茂中游城南記云寺廢毀殆盡惟一墻
儼然則今寺亦非唐剏而墻自宋熙寧火後不可登

萬厯甲辰重加脩飾施梯始得至其顛求記所謂唐人墨跡孟郊舒元興之類皆不可得塔下四門以石為枕枕上唐畫佛像精絕為游人刻名侵蝕可恨東西兩龕褚遂良書聖教序記尚完好而唐人題名碑刻無一存者問之僧云塏前元有碑亭乙卯地震塏頂墜壓為數段今亡矣

金石文字記

長安慈恩寺有河南所書聖教序記分為二碑嵌鴈塏門東西兩傍最完好序云永徽四年十月十五日

建中書令臣褚遂良書記云永徽四年癸丑十二月
十日建尚書右僕射上柱國河南郡開國公臣褚遂
良書此是同州召還後筆稱臣者以御製文非奉勅
書也

銷夏記

同州褚河南書聖教序記

余舊藏褚登善聖教序記婉媚適逸波拂處虬健如
鉄線蓋善本也後陝省致一紙輕弱不足言或以為
翻刻或以為有二本第俱有可疑者舊藏本稱龍朔

三年建按遂良以永徽六年貶潭州顯慶二年徙桂
州未幾貶愛州歲餘卒蓋未嘗生及龍朔也豈遂良
嘗書之至是始摹搨上石耶陝省本則云永徽四年
中書令臣褚遂良書攷之本傳宰相表遂良貞觀末
為中書令後罷永徽三年以吏部尚書同中書門下
三品四年進尚書左僕射疑皆後人附益之耳

弇州

山人稿

此以序記并書一碑在同州道逸婉媚波拂處虬健

如鉄線後署龍朔三年書似勝慈恩本

聖教二碑王元美攷年代官品以為不合署名處疑
皆後人附益良是但元美未嘗至闕中遂不知二碑
所在耳余又按玉海太宗製聖教序高宗為太子又
述記并勒置慈恩寺浮圖永徽四年十月褚遂良書
則大塏本似是真跡而同州本反勝何也

二條石墨
鐫華

按舊唐書褚遂良傳永徽元年出為同州刺史三年
徵拜吏部尚書顯慶三年卒於愛州至龍朔三年則

遂良之亡已五年矣恐是後人追刻也王弘撰曰碑
後有大唐褚遂良書在同州倅廳十字當是後人補
書其書法亦微不類

金石文字記

同州河南所書聖教序記與慈恩寺大小畧同而同
州饒骨慈恩饒韻如出兩手而同州尤有墜石驚雷
之勢後云龍朔三年癸亥六月廿三日建大唐褚遂
良書在同州倅廳按公永徽元年庚戌出為同州刺
史三年還朝六年貶潭州顯慶二年貶愛州三年戊

午卒於貶所至龍朔癸亥卒已六年蓋非手書上石者公歿同人不勝桐鄉之思復摹刻官所寔記所建歲月初不計其存亡其兩地字跡不同者摹手異耳

銷夏記

此碑書龍朔三年是時褚公亡已五年矣似屬可疑按雁塔二碑皆稱臣某此碑直書姓名而不稱臣王弇州所云褚公嘗書之其後模勒上石者容或有之銷夏記金石文字記皆擬為追刻誠是余於雁塔同

州二刻之外又得一本年月同雁塔本而字法不同
碑已有斷蝕處不知此碑在何所諸評論者皆不之
及焉蒼潤軒帖跋論褚公真書聖教之後又一條云
褚公行書聖教序碑立於懷仁集右軍書時蓋是咸
亨三年然則褚公聖教序實有四本又金石錄載有
王行滿正書聖教序并記在顯慶二年余亦收得一
本

光映識

王居士磚塢銘

上官靈芝撰 敬容正書 顯慶三年十月 近出

南山楸梓谷土中

金石文字記

騎都尉李文墓志

碑曰公諱文而不言其姓蓋石斷而亡其半爾文休
承題其幟曰李將軍碑攷唐書及集古錄金石錄碑
目皆無李姓名文者人無可紀史不悉載天下碑闕
至多歐趙不能兼收理或有之第碑又曰夫人李氏
禮不娶同姓則文似非李也唐初功臣率多賜姓而

碑敘官閥有曰開國承祚得非先娶李而後亦賜姓者與休承素稱博洽且不輕妄余是以疑之

金石評攷

同里曹生仲經嗜金石文手拓同州李君碑示余紙墨精善對之眼明碑未詳書者姓氏觀其峻利秀逸非王知敬殷仲容不能造詣及此李君諱文字緯東漢以後字必以兩字稱一字者罕矣載於唐書房玄齡字喬顏師古字籀李衆字師李琇字琇張巡字巡郭曜字曜宇文審字審李恢字祚李絳字堅竇思仁

字恕張義方字儀此外不多見也

曝書亭集

太宗文皇哀冊

正書 褚遂良撰并書

哀冊褚固宜有書乃字法太穉而治雖河南降格而為之亦不至是後人臨仿不可知要不可據以為登善之正果也

墨林快事

褚河南書哀冊刻於吳江史氏余疑為米南宮所臨以其時出米老脚手故也又常獲觀褚書枯樹賦兒

寃贊真跡與此體不類且小米跋尾蓋其晚年語意實有未盡必求售者剪棄後語以冒褚名而希厚價爾觀陳子微跋惟南宮知之下數語可見

金石評攷

天台詹君國器嗜古如嗜利近於汴梁市中購得褚登善所纂唐太宗哀冊文一卷舊嘗藏相臺岳珂倦翁家後有北燕喬實成所題定為唐人書詹君既自識其左復請瀛一言之瀛聞唐故事哀冊國之大典也非職載筆至司鈞衡者不敢為之登善自貞觀二

十二年九月己亥為中書令二十三年三月丁卯太宗不豫四月己亥幸翠微宮五月己巳崩於含風殿庚午奉大行御馬還京師當是時登善秉政中書緝熙帝載者已九月哀冊必屬之蓋無疑也此卷當為命稿之第二故於二十三年下闕歲次己酉五月甲辰八字嗣皇帝下不書治字家傳縉雲下無高祖配天一人有慶八字遡悲風於長下闕衍字然特其闕文耳徵之大詔令蘿圖琬琰集文粹文苑諸書其改

又各有同異殆不能悉數也瀛竊按正史雜史咸謂太宗以八月庚寅日葬與大詔令等書並同庚寅則八月之十八也今獨云庚子則是月之二十八日不知何以有一句之差將史誤耶或稿本之筆訛也嗣皇帝之名不書懼僭也其理固當太宗之崩既書二十六日已巳矣年月甲子初何足隱諱而懸空之耶尤有不可得而曉者相去七百餘載其事不可臆度未可以遽言也若論字畫當為登善所書登善初師

虞世南晚入右軍之室故唐之能正書者僅二十八人而登善居三四之間此卷溫潤似虞其結體則多法右軍世之人徒見登善所書或與薛稷類者遂疑之殊不知先哲有兼人之才而其作字初不拘一體張顛善草書至其小楷極端謹有法傳其學者惟顏真卿得之爾觀登善者宜以是求之簣成雖號能覽古其言似不足徵也國器尚永寶之翰林學士金華

宋濂題

潛溪集

褚河南書太宗哀冊文舊得之先友登州教授郭敬
守先生書家論古名賢遺跡河南傳世之佳者三龕
碑兒寬贊及此帖耳三龕碑未得見嘗見會稽鄧宗
經有兒寬贊墨跡真妙絕此帖亦今世所罕見者余
家諸帖此當為冠

東里續集

晉宋間人以風度相高故其書如雅人勝士瀟灑醞
藉折旋俯仰容止姿態自覺有出塵意陵夷至于中
唐法度森然大備而怒張挺勃之氣亦已露矣唐初

諸賢去古未遠故猶有晉宋遺風觀褚公所書哀冊
豈後人所可髣髴哉古人所為常使意勝於法而後世
常法勝於意意難識而法易知顏柳之書余一見即
知其美此書八九年中凡三見矣今始識其用意之
妙正猶有道君子泊然內運非久與之居不足知其
所蘊也

遜志齋集

兒寬贊

褚書本和易妍美聖教記序可見已緣中有紛披老

筆人遂目以枯澁而謫傳之深可惋歎此贅用意細
貼運筆輕活而一種老成尤自不可及蓋褚書中之
最合作者

墨林快事

枯樹賦

晉賢之後字之瑒瑒成名者褚枯樹其一也屢經翻
摹精神如在況以元美先生付之良工固已足滿海
內之志矣吳興益之以圖早安蛇足况繼之以臨能
無虎皮集為一卷彌添河南之妍此不必容贅惟深

感於此賦之遇也

墨林快事

枯樹賦故龍圖閣壽春魏公家傳云褚河南書其卷
末題識止云貞觀四年為燕國公書而無書人姓名
按徐浩書品云中宗時中書令宗楚客恩倖用事嘗
賜二王真跡二十軸因製為十二屏以褚遂良枯樹
賦為脚大會羣賢張以示之薛稷崔湜輩見之皆廢
食歎息驗此賦河南書明矣然既用作屏而今本乃
橫卷豈非後之好事者重裝褙以便緘藏耶抑河南

書此賦自有別本耶不可復知也觀其筆力道媚頗逼二王非河南不能為也而學者多云燕公子志寧也按志寧曾祖謹仕周開國封燕志寧貞觀末始襲祖封而此賦乃在未封前豈當時公卿自有封燕者而史失其傳耶或志寧嗣封當在前而書傳記之誤耶又不可得而詳也余愛玩其書因究其本末於後

蘇魏公集

右枯樹賦世皆以壽春魏氏為真丹陽蘇丞相辨識

之墨帖既藏魏氏今所傳蘇丞相跋尾者亦模勒也
至或以雍直所臨仿為魏本而系蘇跋其後余此本
得之堦汶陽梁正壽正壽雅好筆墨且自精賞魏鄭
公嘗云褚河南下筆遒勁甚得逸少體資此本皆蘭
亭筆法識者寡云開封丁禹錫毗陵胡承之以勒石
大野晁无咎記

鷄肋集

景龍觀鐘銘

景龍觀者中宗所作景雲二年睿宗為之鑄鐘也正

書而稍兼篆隸奇偉可觀鐘今在西安府城鐘樓

林墨

快事

睿宗景龍觀鐘銘楷書帶有隸篆然文弱如書生知其靡靡不振也且書各有體不得混如大小隸即楷也寫楷者亦惟用其法而不用其象故佳况楷豈可兼篆乎閱李仲璇孔廟碑忽楷忽分忽篆令人噴飯睿宗殆襲其跡耳

銷夏記

景雲觀在脩業坊見宋次道長安志鐘銘睿宗景雲

二年所撰并書字體與順陵碑文畧似猶有八分遺
意間雜篆法姿態橫出妙品也由唐以來歷年既久
當時古跡高臺已傾曲池已平殘碑斷碣僅存千百
之一而睿宗之書獨留至今無恙鐘虞不移亦事之
希有者也

曝書亭集

初唐人作字尚有八分遺意正書之中往往雜出篆
體無論歐虞諸子即睿宗書亦如此猶之初唐律詩
稍似古風平仄不盡穩順開元以後書法日盛而古

意遂亡遂以篆楷為必不相通分為兩部然而蚩之
從虫出之从巴黎之从勿薛之从省虛之從业鼎之
从析出益之从横出此見行於今代者而不察其為
篆也詩篇書法日以圓熟而俗筆生焉亦世道升降
之一端矣

金石文字記

菩薩戒本碑

高堅正書 大歷十三年

太宗廟碑

孫九鼎撰 天寶元年

雲麾將軍李思訓碑

行書 李邕撰并書 在蒲城

李北海翩翩自肆乍見不使人敬而又乃愛之如蔣
子文僥健好酒骨青竟為神也吳興習之加媚似猶
未得其適此雲麾將軍碑尤著者將軍名思訓畫品
在神妙間碑辭絕不之及豈古人以藝為諱耶

弇州

山人稿

北海書逸而適米元章謂其屈強生疎似為未當此碑是其得意者雖剝蝕過半而存者其銛鍛凜然碑在蒲城楊用修謂已斷正德中劉遠夫御史以鍊束之又謂已亡朱秉器又謂良鄉亦有此碑蒲城者趙文敏臨書今蒲城碑尚在未斷無有鍊束事且蒲城李思訓葬處北海真跡的非文敏所能良鄉本肥媚文敏書無疑楊朱二公未嘗至蒲城而朱公尤為瞽

斷
石墨鵠華

李北海書法獨步當時李陽冰評之為書中仙手趙
子昂精心懇習遂亦獨步於元故模榻日廣以至碑
磷字削後為俗工懼其減沒重加修治謂之洗碑典
則由是蕩然矣

金石評攷

此碑久壞不但字之完者日少而畫亦日濶殆與李
他碑經重拓者相類全非公瘦硬古真本色矣

墨林快事

李思訓碑為北海最妙之跡今殘剥已甚余所收者
止缺一二字宋以前搨本為趙文敏故物其題簽乃

手書也北海有兩雲麾碑一李思訓一李秀官同姓
又同思訓碑在陝西李秀碑在良鄉石墨鐫華以為
一碑且以北碑為趙文敏所臨誤矣良鄉碑不知何
時入都城宛平今掘地得六礎洗視之乃秀碑也建
古墨齋貯之不知又何時移至少京兆署中止存二
礎矣

銷夏記

雲麾將軍李秀碑 在良鄉

右唐李秀碑李邕撰并書碑在幽州按明皇以天寶

三年改年為載今此碑元年正月立而稱元載何哉

金石錄

李秀碑僅存二伯許字漫漶不可讀曾於海上顧氏

得全本雄秀異常用其意書此論

董思白書樂志論跋

孫承澤春明夢餘錄曰李秀字玄秀范陽人以功拜

雲麾將軍左豹韜衛翊府中郎將封遼西郡開國公

開元四年卒葬范陽之福祿鄉此碑為靈昌郡太守

李邕文并書逸人太原郭卓然模勒并題額李北海

有兩雲麾碑一為李思訓碑在蒲城一為此碑其官同其姓同也趙子昂秦人未見此碑其著石墨鐫華乃以為一碑又以此碑為趙子昂所臨誤矣碑不知何時入都城萬厯初宛平令李蔭署中掘地得六礎洗視乃此碑存者百八十餘字碑首存唐故雲三字因築室砌之壁間名曰古墨齋後移少京兆署中止二礎其四礎相傳萬厯末王京兆惟儉携之大梁

金石

文字記

黎民表古墨齋記云良鄉縣有雲麾將軍碑舊置官
廨不知何時為校官裂為柱礎墨本遂不見於世近
復修學舍更以新砥置而不用推之瓦礫中過者不
睨也邵生正魁董生鳳元往經其地蹤跡之則古礎
存焉規如鍤鑑字尚未泐也以語宛平李侯于美侯
喟然興歎寓書縣令輦致都下云云得此記乃知是
碑入都之由在少京兆署中止二礎匪菴吳公涵居
是官時求之不得後忽得於蔓草間珍重異常甃之

文信國祠壁蓋以存官署中已經一失再失而遇好古若王某又或取之而去不若存是祠之得以無虞也吳公有記刻石

光暎識

李北海千字文

首題云行書千字文末云開元十九年三月廿八日隴西李邕書

北海此書固與岳麓雲麾相似而較不露筋骨法密而神暇姿態殊勝趙松雪千字文似從此脫胎要之

松雪自行其本色不必合亦不能合也此碑不知置
於何所存不存不可攷顧余所見記載碑刻諸書無
一及此碑則此碑久不存可以意斷矣

光暎識

少林寺戒壇銘

李北海行楷書

此書初於秀餐軒帖中見之似未盡北海筆法之妙
既而得原碑本一帙有倦圃曹先生鑒賞印觀其筆
法之妙無所不具難於形容許靈長先生跋云余見

北海書數十種用筆各異唯岳麓雲麾相似此帙世
不概見出奇無窮抑先生晚年之筆與每作志傳皆
手自勒石伏靈芝黃仙鶴皆寓言也許故書家善鑒
別以此碑筆妙并信其手勒其推重此碑如此按金
薤琳琅記戒壇碑其云三藏法師義淨製開元三年
正月十五日立皆同碑本獨於書人則云南館學生
張傑又注缺字凡九不似碑本之無一缺字明是李
張各有一碑矣獨不應立碑之同月日也是不可解

也弇州續稿云少林戒壇銘開元三年為學生張傑
書當是時傑應尚少且不以書名而筆法老成乃爾
又時未盡習帝書故猶有瘦勁意此條與金薤琳琅
俱是作張碑跋不及李碑誠無足怪而嵩山志云張
傑書天下金石志云張傑八分書俱言張而不及李
豈於李碑皆未之見耶

光暎識

岳麓寺碑

余友俞仲蔚為余言李北海岳麓寺碑勝雲麾余亟

購得之僅可讀耳其鉤磔波撇雖不能復尋覽其神情流放天真爛漫隱隱殘楮斷墨間猶足傾倒眉山吳興也題名稱前陳州刺史按邑謁上太山還獻詞賦上悅會有仇人發其贓者張說忌之下獄論死許昌男子孔璋救之得免謫尉遵化此其赴謫時道書也碑文頗庸陋又於杜拾遺集見其一詩穉語殆不可曉何以負千將莫邪稱於世耶米元章評其書如乍富小民屈強生疎此語殊未當書故佳小佻耳邑

以纖文獲名以虛名獲死以佳書獲訾皆所不虞者

因附識之

弇州山人稿

是碑筆勢雄健在雲麾之上刻字亦出公手

蒼潤軒

帖跋

此碑俞仲蔚謂勝雲麾王元美謂殘楮斷墨猶足傾
倒眉山吳興余初未之見一日游長安有書賈持一
碑來售余知其為北海書丞仲之則岳麓寺碑也雖
漫漶然筆意猶存亦不能勝雲麾差伯仲耳雲麾下

半已無字上半存者乃如新此碑雖首尾皆可讀而
鈎磔波撇不復可尋當是石理有堅脆也

石墨鐫華

岳麓碑雖已殘剥然其鋒穎尚凌厲不可一世北海
奇人故所書爾爾昔俞仲蔚謂此碑勝雲麾必有所
見也北海書宋初人不甚重之至蘇米而稍襲其法
又至趙文敏每作大字一意擬之北海諸碑皆手自
鐫所云黃仙鶴伏靈芝無其人而託名也歐陽公云
李邕書余始甚不好之最晚譬猶結交其始也難

則其合也必久全

銷夏記

娑羅樹碑

娑羅樹碑是北海筆道逸豐美而不傷佻卞當是合

作書也

弇州山人稿

北海得意之碑今有數種惟雲麾存其半其東林法華葉有道皆經再刻此亦淮上重翻者法華有其骨而此有其色皆足稱尊藝苑大抵李法專以力勝一筆一畫如純剛貞玉壯士不能屈利及不能入一切

金史卷之八
奇怪斜傾一二遊戲在公原不自以為佳後世之子
雲自有其目寧有為其所欺而景仰之者況以為法

乎
墨林快事

今重刻在淮安府張弼曰其末曰一歸可門可門者
何門也攷說文誰何之何本單作可其从人者則為
儋何之何易何校滅耳詩何蓑何笠爾雅何鼓謂之
牽牛是也後借為誰何之何更以擔荷為儋何字字
日繁而忘其本此文以可為何可見開元時文字尚

存古法

金石文字記

北岳府君碑

行書 韋虛心撰 陳懷志書 開元九年 今在

開陽縣北岳廟中

金石文字記

陳懷志此碑在李北海雲麾之下法華之上蓋以其
筋骨有餘而丰度微澁爾

蒼潤軒帖跋

伯夷叔齊二公碑

八分書 梁昇卿撰并書 開元十三年 今在蒲

州首陽山二貞廟中其文書於碑之兩面其側有後
唐同光元年護國軍節度押衙丁約建立廟宇題字
金石文字記

道安禪師碑

行書 宋儋撰并書 開元十五年 今在嵩山會
善寺廢戒壇前中斷

宋儋字藏諸廣平人高尚不仕戶部侍郎宇文融薦
為秘書省校書郎字作鍾體而側戾放縱迹不副名

開元中舉場中後輩多師之

述書賦志

宋儋筆墨精勁子瞻嘗云其人不解此狡獪書便不足觀如儋書畫不可棄也

黃山谷集

右道安禪師碑宋儋謨并書在戒壇寺西南按志載傳梅云道安禪師碑廣平宋儋撰并書文尚可讀字適勁多骨而風致超逸出李北海上末云建塏僧破竈下損一字袁中郎謂為神僧破竈墮余細辨損處下從木不似墮字豈嵩山有兩稱破竈者乎可疑也

余謂此書雖有風致然用筆傾側殊遜北海書史評
儋書如寒鴉棲木平沙走兔是為似之耳至淳化閣
帖誤列儋書於秦程邈之後絕勝於此而黃山谷亦
稱儋書筆墨精勁又稱儋書姿媚尤宜於簡札惜不
多見則固當時名筆也今碑已於萬厯時雷轟為兩
截為土所瘞踰二尺許掘地得之文甚模糊不可讀

葉井叔嵩山石刻記

敬節法師塏銘

正書 開元十七年 今在西安杜永村

金石文字記

李承嗣造佛像贊

正書 長安三年

金石文字記

中岳潘尊師碑

八分書 王適纂 司馬承禎書 聖歷二年 今

在嵩山老君洞南題云弟子中巖道士獄馬肅篆書

按唐書隱逸傳司馬承禎字子微事潘師正傳辟穀導引術無不通師正異之曰我得陶隱居正一法逮

而四世矣則此碑稱弟子者司馬承禎也廣韻獄亦
司字老君洞即唐之逍遙谷潘師正傳云居逍遙谷
高宗詔即其廬作崇唐觀及營奉天宮又勅直逍遙
谷作門曰仙遊曰尋真

金石文字記

高延貴造佛像贊

正書 長安三年


金石文字記

王徵君口授銘碑

正書 弟紹宗甄錄并書 垂拱二年 今在嵩山

老君洞南徵君即王玄宗也

金石文字記



金石文攷畧卷八

欽定四庫全書

史部

金石文考略卷九

詳校官編修臣潘廷筠

編修臣程嘉謨覆勘

總校官中書臣朱鈴

校對官助教臣羅萬選

謄錄監生臣倪景寬

欽定四庫全書

金石文攷畧卷九

嘉興李光暎撰

明堂令于大猷碑

此碑僅存強半書法全出登善峻拔遒健可為傳神而書者名氏遂不可求惜哉按大猷志寧之孫立政之子志寧之玄孫顯於肅代朝傳云休烈父默成沛縣令早卒合之正為四世但不知默成者是大猷子

否趙明誠有默成碑今不可得見矣

石墨鐫華

今在三原縣碑云聖歷三年歲次庚子十一月十二日合葬於雍州三原縣萬壽鄉之先塋而碑非此時立也蓋後續為之故其書並不用武后所製字

金石

文字記

興聖寺尼法澄碑

行書 開元十七年 今在西安馬頭空

金石文字記

元氏令龐履溫碑

八分書 邵混之撰 蔡有鄰書 開元二十四年

今在元氏縣西寺內

碑陰有宋熙寧九年孟士龍遷碑記滎陽鄭陶撰

金

石文字記

淄川公李孝同碑

孝同者淮安靖王神通之子史但附名神通傳末碑
亦磨泐可讀者才半中有云太宗為秦公孝同隸焉
承間啟王曰秦公瞻視非常功業又大雖非儲貳必

膺寶曆靖王心然之云云此亦可見矣撰文姓氏已不可求書者據趙明誠為諸葛思禎今亦磨蝕但其筆法虬健波拂處大類褚河南可寶也

石墨鵠華

大照禪師碑

行書 李邕撰并書 天寶元年

大照名普寂大通秀之嗣去達摩七世是名北宗門庭甚盛所謂兩京法主三帝門師者也碑當在嵩岳寺今不存拓本乃翻刻者不逮雲麾岳麓亞於娑羅

耳 金石文字記補遺

杜子美稱李北海碑版照四裔余行游天下見東林
岳麓諸碑皆宋以後重刻耳大照禪師碑乃唐時硬
黃雙鈎神采煥發結構古雅宋時尚不聞其名況見
其跡乎余最嗜李書晚獲觀此遂摹勒上石以公同
好雖謂之唐搨可也

容臺續集

金陵俞仲茅先生藏李泰和大照禪師碑二千餘字
硬黃紙筆法精整清栗有歐虞風味視他書欹側踈

豪者大不同先生云此書自唐以來即為高麗所藏以故絕無宣和政和等璽羣玉秋壑等印與蘇米等跋神廟末年一弁得之平壤將獻之幕府媒進余策遼事之必敗戒其毋遽往已而果然此卷遂留余處稍酬之金帛不能滿其意也而終無肯昂直應者故尚為余物耳世傳北海石本娑羅雲麾率以宕逸取奇與此絕不類乃知古人勝處初不可以一途取如菩薩神變散入諸趣在具眼者熟叅之蕭然有得也

六硯齋二筆

延陵季子廟記

蕭定撰 張從申書 大歷十四年

丹陽城西南六十里有延陵鎮去鎮九里為吳季子廟有孔子十字篆碑及潤州刺史蕭定修廟記大理司直吳郡張從申書并識重刊篆碑歲月二碑蓋同時立也歐陽公不喜從申書僅錄其三碑今存者獨此耳昔人評張書頡頏李北海今觀遺刻挺勁有餘

而乏雋逸之氣恐未堪肩隨也

金石文字記補遺

嵩山少林寺碑

裴灌撰并書 開元十六年

唐嵩岳少林寺碑吏部尚書裴灌撰并書少林寺在河南登封縣少室山麓去嵩岳二十里嵩岳一稱太室故有少室而此寺曰嵩岳者統於尊也余正德癸酉常游嵩岳訪少室留宿寺中見殿後有立雪堂相傳達摩之徒慧可欲嗣其法雪深至腰不知即其處

寺右上山三里有達摩洞洞有石達摩面之九年形
宛然石上其事甚異達摩為釋氏西來初祖可稱二
祖碑雖及其人而二事皆不之載寺復有太宗與僧
教書石刻蓋太宗為秦王時寺之僧禽王世充以獻
故太宗賜書褒美而碑云僧執世充姪仁則以歸與
教書不同余故書之以見古人之文不無缺誤如此
然非余之親歷則亦莫能知也

金薤琳琅

裴懿公灌書少林寺碑開元十六年建又在嵩山而

金石錄不載何也裴少時負文筆號霹靂手而雅不以八法名此碑辭至沓拖不可讀而書頗秀勁多媚態得非時代為之耶傳不載階封此書銀青光祿大夫正平縣子亦可補傳之闕

弇州山人稿

碑首太宗皇帝御書七大字分書出開元帝中刻太宗征王世充時移寺主并軍民檄所謂御書即此也但其中止世民二字以渴筆草書填之餘皆正書不類文皇而開元帝以為御書賜額何也下方則裴懿

公淮撰述寺之始末并書淮負文筆號霹靂手不以
書名而此文殊不及書書法秀勁其得意處漸升伯
施之堂矣

石墨鐫華

唐碑遇帝號必空三字此碑所記宇文周事有明皇
帝皇上空三字有隋高祖祖上空三字而前有周武
帝却不空蓋縑流不通古今者之所為也

碑內王字俱鐫去按金史海陵正隆二年二月癸卯
改定親王以下封爵等第命置局追取存亡告身公

私文書但有王爵字者皆立限毀抹雖墳墓碑誌並
發而毀之則知前代封爵之碑有王字者多毀仆於
此時而此碑以梵力獨存乃其間王宮夏王王言育
王等字亦從而鐫去矣完顏之不通文義而肆為無
道可勝歎哉

二條金石文字記

贈池州刺史馮公碑

八分書 崔尚撰 郭謙光書 開元十一年 今
在咸陽縣其文曰公諱仁口字太玄長樂人馮文王

之脩也仁下闕一字

金石文字記

此當是道士馮道力父名仁口字太玄道力與劉承
祖占玄宗當受命潜布欵誠開元中拜道力銀青光
祿大夫冀國公而又拜其父朝散大夫使持節池州
諸軍事池州刺史也開元十一年五月卒十一月壬
申葬咸陽北原建碑今在長陵西碑云意得玄珠謀
叅黃石同心戴舜以為天子蓋指玄宗受命事也書
者為國子監丞郭謙光謙光又嘗書韋維碑見鄭樵

金石畧朱長文古碑攷則其書亦小有聲者此碑分隸自是名家惜剝蝕不可搨

石墨鵠華

右碑在縣東四十里漢長陵西下里許野中字八分書剝落過半存者儘有可玩近下半入土中北望平衍莫識墓之所在拂拭苔蘚辨別形似讀之如右郭監丞當時名筆又分書唐太子右庶子韋維碑古碑攷載在京兆向未搜得見是碑亦差慰想並記

金石

遺文

碧落碑

篆書

韓王元嘉四男為母房太妃立碑云有唐五十三祀

龍集敦牂則咸亨元年也

唐書言垂拱中元嘉徙絳州刺史與此不合

今在絳州有咸通十一年鄭承規釋文但篆文難通者頗多而翻刻復多舛誤如淮館儀僊釋僊為山貪逮餘漏釋逮為建注儀鄰以同煥釋同為洞直書心事釋書為言敏心感慕釋敏為叨並誤

敏古叩字出周禮宋謝靈運山居賦卷敏肱之逸曲
感江南之哀歎用此字此碑用粵若稽古作乚託字
作侂宋韓侂冑字本此 三條金石文字記

右碧落碑在絳州龍興宮有碧落尊像篆文刻其背
故世傳為碧落碑據李璿之以為陳惟玉書李漢以
為黃公譔書莫知孰是洛中紀異云碑文成而未刻
有二道士請刻之閉戶三日不聞人聲人怪而破戶
有二白鵠飛去而篆刻宛然此說尤怪世多不信也

碑文言有唐五十三祀龍集敦牂乃高宗總章三年
歲在庚午也又云哀子李訓誼譔譔為妣妃造石像
按唐書韓王元嘉有子訓誼譔而無譔又有幼子訥
元嘉以則天垂拱四年見殺在總章三年後十八年
有子訥不足怪而不應無譔蓋史官之缺也

集古錄

碧落篆李肇得觀中石記為陳惟玉書字奇古行筆
精絕不類世篆學而惟玉於唐無書名於世不應一
碑便能到古人絕處李陽冰於書未嘗許人至愛其

書寢卧於下數日不能去段成式謂碑有碧落字故以名之李肇謂碑在碧落觀故名李漢謂終於碧落字而得名余至絳州龍興宮考其記知舊為碧落觀又篆文若未畢者終非碧落字則肇說是也其云有唐五十三禩龍集敦牂永叔謂高宗總章三歲以唐歷攷之實咸亨元年總章者誤也

絳州碧落篆刻天尊背州將不欲以搥擊石像迺摹別石因封其舊石像今世所得皆摹本也雖橫直圜

方典型有稽然遁其神者衆矣段成式言樊宗師作誌令陳惟玉立太行山上此言險怪難知豈嘗求得其當而妄戲哉世言字不攷古甚則以𠵽為鄰今於古文鄰字正如此便知後世不識古字而妄議者可以歎也

二條廣川書跋

右唐碧落碑大篆書其詞則唐宗室黃公譔所述或云陳惟玉書或云譔自書皆莫可知李肇及李漢並言李陽冰見此碑裴回數日不去又言陽冰自恨其

不如以槌擊之今缺處是也此說恐不然陽永嘗自述其書以謂斯翁之後直至小生於他人書蓋未嘗有所推許唐人以大篆當時罕見故妄有稱說耳其實筆法不及陽永遠甚也

金石錄

段成式謂此碑有碧落字故以名李肇謂此碧落觀也故名李漢謂終於碧落字而名歐陽公謂其宮有碧落尊像文刻其背故名碧落碑董道攷其地原名碧落觀改龍興宮以李肇說為是其書雜出頡籀鐘

鼎款識或以為陳惟玉書或以為李謨李謹書皆不可辨洛中記異錄又云刺史李謹為母房太妃追薦造像成有二道士來請書之閉戶三日乃開化二白鵠飛去篆文宛然像背此說尤怪誕然李陽冰觀之七日而不忍去學之十二年而不成其妙如此豈易知哉又一說陽冰毀其佳者數字而去未知然否篆文原刻像背州將以不便摹搨別刻置廟中今所傳皆模本也其文曰有唐五十三禩龍集敦牂歐公謂

為高宗總章三年董道謂為咸亨元年按總章三年三月始改咸亨耳

釋文鄭承規書咸通中立書法方整甚有歐虞遺意
二條石墨鵠華

絳州碧落碑唐高宗咸亨元年庚午歲韓王元嘉之
子訓等為其妣房氏造碧落天尊像於龍興宮而刻
其文於背故以名碑然不知何人書據李旋之玉京
宮記以為陳惟玉李漢黃公記以為李訓弟譔殆莫

能定而翠巖龔聖子則又以為宗室權豈或有所攷

耶吳叡張天雨讀

缺

為喧為曜者非當以釋文鄰字

為是俞希盧辨叨作叩亦大家而釋文則又訛矣蓋
此雜出於鐘鼎篆籀諸文其亦憂憂乎難知哉從水
從人說文中音乃歷反溺則音奴弔反釋文今借伙
為弱亦恐非本字之義而其他可疑者甚衆攷禮之
冗未暇及之姑識其後俟博雅君子正焉

宋鑾坡

碧落碑石本吾子行所藏自云手補首行五字及十

五葉一行之闕今觀補字非子行不能作也獨跋語謂以籀文歸小篆為妙絕恐未必然周伯琦疑其雜出諸體者得之蓋其妙在筆不在體也此帖數傳至陳刑部明之予嘗見此刻久不復識手臨二本輒為好事者取去數月後偶檢舊藏而得之則首行故在其中乃缺三十餘字豈模搨先後互有異耶古刻沒不完此固可寶而子行之篆伯琦之隸與楊宗道之楷書宋潛溪之題跋皆不可得已明之其永寶之

懷麓堂集

騎都尉薛良佐塋銘

正書 再從兄鈞撰 弟良史書 天寶三載

文言年止廿八卒於里第塋於終南山施陀林善知

識之次此官而葬以僧者

金石文字記

中岳永泰寺碑

行書 沙門靖彰撰 荀望書 天寶十一載 今

在嵩山永泰寺

金石文字記

任城縣橋亭記

八分書 游芳撰 王子言書 開元二十六年

今在濟寧州儒學泮池上

金石文字記

書在唐隸中為古雅文極藻可誦

蒼潤軒帖跋

右任城縣橋亭紀唐開元廿六年任城尉游芳撰王
子言隸書雖出唐人古意蒼然後之人能若此者甚

少吾家唐隸獨有紀信及此二碑耳

東里續集

景教流行中國碑

正書 僧景淨撰 呂秀巖書 建中二年太簇月

今在西安府城外金勝寺

金石文字記

景教流行中國碑書法秀逸遒勁唐石之最佳者余
前此未見已亥之秋王文含自秦寄至未知碑在何
地何以能完好如此

銷夏記

華嶽精享碑

此開元帝遣蘇頲禱雨華山有應而建碑也作者為
主簿咸廩書者為御史劉升升見金石畧僅二碑而

遺此今觀其隸古適逸有漢人遺意五代以降求此
一批法不可得矣

石墨鐫華

今在華陰縣西岳廟中其文即刻於後周天和二年
頌碑之陰宣義郎行華州華陰縣主簿咸廩撰殿中
侍御史劉升書銀青光祿大夫檢校華州刺史上柱
國李休光題額碑之右傍有顏魯公大字題名乾元
元年十月左傍有賈竦謁華岳廟詩元和元年十月
作并書太和六年四月姪男宣義郎行華州叅軍琚

重修碑之下方亦有唐人題名此碑前後空處為宋人攬入題名甚多幸正文皆八分書題名或隸或行不相混耳廟中古碑嘉靖末地震多毀唐碑惟此與述聖頌二通僅存

古碑陰多無刻字故後周之碑而唐人得以刻之觀此碑而周人之質樸唐人之謙約兩見之矣按此為華陰縣主簿咸廩而新唐書趙冬曦傳有大理評事咸廩業亦開元時人恐即是一人

二條金石文字記

孔溫裕修廟碑

溫裕孔子三十九代孫能以私俸奏請葺廟宜蒙嘉獎矣碑賈防纂文聊畧未稱書者無名氏而亦有顏清臣柳誠懸遺意不作惡札

石墨鵠華

此咸通中孔子三十九代孫溫裕以魯國公鎮鄆曹濮所出私財修廟之記連原奏并勅共刻一石無書人姓名惟存纂人賈防字存歐虞遺法或纂人自書不可知夫防以鄉貢進士攝巡官乃其評湯武桓文

之德之功而推重於孔子雖取論於已定之後然亦
具有南宮适宰我之識焉此即不以石字見收亦可
以孤行於後世況字又古雅可錄固宜與孔廟共悠
久也況唐之崇聖溫裕之尊祖均可傳之來斯為撮
其文都俾有攷焉

墨林快事

遺教經

右唐遺教經國初時人盛傳為王右軍書歐陽公識
其非是余家藏金石刻二千卷獨此經最為舊物蓋

先公為進士時所蓄耳

金石錄

歐陽永叔以為唐寫經手黃魯直謂此書在楷法中
小不及樂毅論今世不知樂毅論已遭火而別本為
薛崇徹所藏亡於五溪其搨本皆摹畫善者則亦與
寫經手何異但此書疏肥令密密瘦令疏自得古人
書意其為名輩所推良有以也嘗得佛戒經其碑乃
比丘道秀書與此經一體率化衆緣共崇鐫刻則知
為道秀所書道秀德宗時人其書當建中三年壬戌

蓋永叔魯直不見碑陰故所評如此

廣川書跋

太尉李光顏碑

正書 李程纂 郭虔書 開成五年 今在榆次

縣 金石文字記

光顏光進皆以功蓋天下時人以大小大夫別之兄弟孝睦載於舊史而碑稱光顏平吳元濟師旋請於朝葬其兄則史傳所未及

曝書亭集

憫忠寺重藏舍利記

采師倫正書 會昌六年 今在京師憫忠寺此初

復佛寺之文

金石文字記

右采師倫書重藏舍利塏記在京師憫忠寺碑建自
唐會昌六年文稱舍利舊藏智泉寺寺經始於元魏
幽州刺史尉萇命故又號尉使君寺按北史萇命太
安狄那人萇作長叅預齊神武起兵破尔朱兆者其
曰節制司空清河張公則仲武也當武宗詔毀佛寺
地分三等幽州等居上許留僧二十人尋又詔諸道

留二十人者減其半故碑云勅於封管八州內寺留一所僧限十人至是年宣宗即位遂弛其禁先是智泉寺已燬遂以舍利歸憫忠寺焉仲武在幽州屢破回鶻鄭畋謂會昌時功第一方毀寺之歲五臺僧多奔幽州仲武封二刀付居庸關曰有游僧入境則斬之及宣宗增置僧寺碑稱司空固護釋門殷誠脩敬若是乎前後不相侔者蓋仲武功名之士宜其好惡與時移也師倫無善書名然猶存王知敬薛稷遺意

亦能拔乎俗者

曝書亭集

憫忠寺葬舍利記

舍利塏一燔於太和八年一燼於中和二年至是僧復嚴葬舍利於憫忠寺觀音像前南敘述記知常書之碑中所云隴西令公大王者李匡威也匡威欲遷舍利於閣內至拜疏於朝請發封壤詔可而後行當時崇重法寶如是

金石文字記補遺

右唐景福元年僧復嚴葬舍利於憫忠寺觀音像前

於是南叙述記知常書之碑云隴西令公大王者李
匡威也是歲李克用王處存合兵攻王鎔匡威救之
有詔和解河東及鎮定幽四鎮碑稱欲遷舍利於閣
內陳辭請發封壤上許之蓋匡威方恃燕薊勁旅有
雄天下意宜有請無不許者碑文侈陳發緘時舍利
光芒異香郁烈外石函封內金函闕其崇奉象教至
矣迨明年匡威復出師救鎔其弟匡儔據軍府自稱
留後匡威進退無所之鎔迎館於鎮登城西大悲浮

圖顧望流涕未幾以圖鎔見殺然則事佛果得福乎
舍利之塏一燔於太和八年一燼於中和二年今匡
威所建之閣遺跡已不可問其碑僅存焉爾已陪佛
脚俾工拽而出之搦以藏諸笥

曝書亭集

國子學石經

今在西安府儒學其末有年月一行題名十行曰開
成二年丁巳歲月次于亥日惟丁亥書石學生前四
門館明經臣父居晦書石學生前四門館明經臣陳

玠書石學生前文學館明經臣

原缺四字

書石官將

仕郎守潤州句容縣尉臣段絳校勘兼看書上石官
將仕郎守秘書省正字臣栢嵩校勘兼看書上石官
將仕郎守四門助教臣陳莊士覆定字體官翰林待
詔朝議郎權知沔王友上柱國賜緋魚袋臣唐玄度
校勘官兼專知都勘定經書檢校刊勒上石朝議郎
守國子毛詩博士上柱國臣章師道朝散大夫守國
子司業騎都尉賜緋魚袋臣楊敬之都檢校官銀青

光祿大夫

原缺十字

國子祭酒同中

書門下平章事太清宮使監修國史上柱國滎陽郡
開國公食邑二千戶臣覃按舊唐書開成元年正月
中書門下奏起居舍人集賢殿學士周墀監察御史
張次宗禮部員外郎孔溫業兵部員外郎集賢殿直
學士崔球等同勘校經典釋文又云令率更令韓泉
充詳定石經官新唐書亦列墀等四人而碑並不載
舊唐書文宗紀開成二年宰臣判國子祭酒鄭覃進

石壁九經一百六十卷時上好文覃以經義啟導稍折文學之士遂奏置五經博士依漢蔡邕刊碑列於太學創立石壁九經諸儒校正訛謬上又令翰林勒字官唐玄度復校字體又乖師法故石經立後數十年名儒皆不窺之以為蕪累甚矣舊史之評如此愚初讀而疑之又見新書無貶辭以為石壁九經雖不逮古人亦何遽不賢於寺碑冢碣及得其本而詳校之乃知經中之繆戾非一而劉昫之言不誣也

二條

金石文字記

金石文字記著石經之繆戾一某字誤作某字及脫字多字一與今文不同而兩通者一先誤而後改一標題有八分書正書之異一旁注一續添一先脫而後添注一辨二十字三十字作卅卅字之非具在本記至明且悉覽之頗怪當時之校勘何其太疎也又所云諱創業不祧之廟諱七廟而祧廟不諱又成城字缺筆知為朱梁所補刻皆足以免後人之疑

光
暎
識

長安縣丞蕭思亮墓誌

正書 顏惟貞纂 景雲二年 近出西安府城南

神和原土中 金石文字記

淨域寺法藏禪師塏銘

正書 田休光撰 開元四年 今在西安府南山

金石文字記

衛州共城縣百門陂碑

行書 辛怡諫文 張元琮記 孫去煩書 長安

四年

今在輝縣

金石文字記

比丘尼法琬碑

正書

僧承遠纂

劉欽旦書

景龍三年

今在

西安府城外賈里村

金石文字記

兗公頌碑

正書

張之宏纂

包文該書

天寶元年

今在

曲阜縣孔子廟中

舊唐書禮儀志開元二十七年八月制追謚孔子為

文宣王贈顏子淵兗公閔子騫費侯冉伯牛鄆侯冉仲弓薛侯冉子有徐侯仲子路衛侯宰子我齊侯端木子貢黎侯言子游吳侯卜子夏魏侯又贈曾參顓孫師等六十七人皆為伯

金石文字記

兗公顏回也字子淵碑避高祖諱作子泉都督李庭誨命縣令張之宏纂頌包文該正書書道勁有法石

惡多泐耳

石墨鐫華

楚金禪師碑

正書 沙門飛錫纂 吳通微書 附奉勅追謚號

記 貞元二十一年 在顏魯公多寶塔碑陰

金石

文字記

吳通微為學士工行草然有譏其近吏者此碑清圓
婉逸雖鉤磔小減而亦微有晉之丰度觀者當自得
之 石墨鵠華

按賈氏談錄言通微為學士工行草然體近吏中州
士大夫效習之謂為院體此碑清圓有餘遒勁不足

即所謂院本體非耶得顏尚書小許鉤磔便脫此病

夏熱偶題

弇州山人稿

嘗見山谷老人作字沓拖彼蓋自詫為前無古人人亦推其自出機杼以致後人之慕者日趨惡札及觀吳通微則古已有此路但山谷天資高不由一家入不至奴書耳今比二家之書皆以自得為奇吳自得於法度之中其不合者少黃自得於法度之外其不合者多乃失之吳在俗而得之黃在雅豪人固不棄

雅以就俗而學子亦不可貪雅以廢法然僧文既惡
僧事亦非奇吳甘為之把筆若黃則無此矣

墨林快
事

書學之盛莫踰李唐今世雖紙爛墨渝而收者得其
一字猶鳳毛麟角不嫌於少多寶佛塢魯公之書遍
天下而通微此刻僅見之即此可以想見當時之盛
矣故世人有言者曰收藏貴富貴鑒宜精二者我今
見之印翁夫子矣

蒼潤軒帖跋

實際寺碑

實際寺主懷惲碑無書撰人姓名觀碑中有弟子思
莊敬想清徽勒茲玄琰之語則碑乃惲之徒所纂碑
稱惲能誦般若神咒際遇高宗武后兩朝可謂縉流
之出色者而其老也乃患惡疾以死朝廷復贈之曰
隆闡法師然則其法果安在哉

金薤琳琅

此碑行書源出聖教而漸作婉媚纏繞殊乏晉人瘦
勁蕭疎之趣碑為懷惲立都元敬云無書纂人姓名
碑中有弟子思莊敬想清徽勒茲玄琰則碑為惲之

徒所撰未知是否而王元美曰僧懷惲撰及書頗亦
能為其家言筆法尤圓嫻有聖教遺意今碑中叙惲
生死甚備明云大足元年十月二十二日神遷春秋
六十有二神龍元年勅贈隆闡大法師天寶二年建
碑又弟子思莊云云如元美言豈惲鬼纂書耶蓋碑
首後人妄增懷惲及書四字文理本不屬而元美疑
於及字上當有撰字遂誤耳元美博學絕世似未見
都元敬金薤琳琅又似未讀竟此碑然謂惲頗能為

其家言又似并取其文者至人乃作夢語何也

石墨

鵠華

惲公死後贈號而生前自書此可笑事然此碑晚出
未為人賞故人亦無談及之者今詳其筆法最佳乃
表而章之以是人漸知有此書而疑之愈甚不知此
為學逸少也唐初大王書全出而真者亦多有之惲
公平日必多有臨習之者存焉及其化去贈後而其
門人知師素心既不忍沒師之迹又恐他人書石不

稱師之雅志故集而刻之今以為師書固佳而就之
索會稽遺法更近人之寶之合不居藏序下也

墨林

快事

今在西安府學題曰唐實際寺主懷憚奉勅贈隆闡
大法師碑銘并序其下曰懷憚及書蓋不可曉

文中有弟子大溫寺主思莊敬想清微勒茲玄琰疑

即其所書

二條金石文字記

唐安寺尼明空墓誌

王鋌撰 太和八年

再建福田寺三門記

楊知新述 李少鴻書

道因禪師碑

王元美曰評者謂蘭臺瘦怯於父而險峻過之此碑如病維摩高格貧士雖不饒樂而眉宇間有風霜之氣可重也余謂蘭臺故學父書而小變為險筆時兼隸分自是南北朝流風餘韻李仲璇孔廟碑趙文淵

所書華岳碑可覆觀也

石墨鵠華

偏鋒古未有也小王即云濫觴而其精神筋力仍在
畫中未有全憑畫之正背兩邊以稜芒見奇者有之
自大歐始然亦因八分之餘勢稍出一二筆耳而小
歐乃全用之於主筆峭厲激昂幾失古人冲和渾樸
之致開惡札之端及宋人而筆筆皆偏即以長公之
習顏非不厚重而大抵只於筆兩邊見奇右軍以來
之法蔑也盡矣

墨林快事

歐陽通正書較信本流麗有餘而嚴敬不足杜詩云
書貴瘦硬方通神今以此視化度醴泉諸碑已自癡
肥矣然學者自非求信本之迹則亦執柯伐柯取則
不遠也

蒼潤軒帖跋

范陽郡新建文宣王廟碑

行書 韋稔撰 張澹書 貞元五年 今在涿州

金石文字記

同州澄城縣鄭公德政碑

行書

原缺

纂

鄭雲達書

貞元十四年

今在

本縣文多剝泐但云公字教鄭州滎陽人而不得其

名

金石文字記

寂照和尚碑

此碑在咸陽西馬跑泉地中武功康子秀先生過而識之以語土人豎於道傍其後王咸陽移之咸陽城中寺以碑有安國寺字遂改名其寺為安國寺按碑段成式纂僧無可書成式文筆自奇此文為佛言尤

奇無可賈島從弟有詩集傳世其書法出柳誠懸而

優孟者子秀名椿太史德涵子也

石墨鵠華

無可之書固一時習尚石經多此法可知也然此碑

則導源二歐掩有河東清道圓利洵可擅一時之技

出諸書僧之上

墨林快事

少林寺廚庫記

正書 顧少連纂 崔漑書 貞元十四年 今在

寺中

金石文字記

鉅鹿縣時侯墓誌

行書 劉通明纂 貞元二十一年

其文曰葬薊縣燕夏鄉海王村之南原近出之土中

字拙而率

金石文字記

顏師古製頌

四言十章章八句有序

某府君墓銘

貞觀元年

供養記

景龍元年

大智禪師碑

八分書 史惟則書 開元廿四年

此碑為唐史侍御惟則書竇臧賦述稱史書古今折衷大小應變聲價極不落莫也其行筆絕類太山銘而縝密過之知開元帝潤澤所自耳大智師北宗之錚錚者嚴挺之粗能其家言俱可存也

弇州山人稿

史惟則分隸書寶泉稱其古今折衷大小應變如因
高而矚遠俯川陸而必見今觀此碑信是開元間分
書第一手嚴挺之文亦麗則可觀大智師見唐方技
傳傳云開元二十年卒碑云二十四年

石墨鵠華



金石文攷畧卷九

欽定四庫全書

史部

金石文考略卷十一

詳校官編修

臣滿廷筠

編修臣程嘉謨覆勘

總校官中書

臣朱

鈐

校對官助教

臣羅萬選

謄錄監生

臣李覲光

欽定四庫全書

金石文攷畧卷十

嘉興李光暎撰

御史臺精舍碑

八分書 崔湜撰 梁昇卿書 開元十一年

御史臺精舍記崔湜纂梁昇卿書讀其文則湜於佛
可謂篤信者矣唐書列傳云桓彥範等當國畏武三
思使湜陰伺其姦而三思恩寵日盛湜反以彥範等

計告之遂勸三思速殺彥範等以絕人望因薦其外
兄周利正以害彥範等又云湜貶襄州刺史以譙王
事當死賴劉幽球張說救護得免後宰相陷幽球嶺
表諷周利正殺之不果又與太平公主逐張說其餘
傾邪險惡不可勝紀世言佛之徒能以禍福怖小人
使不為惡又為虛語矣以斯記之言驗湜所為可知
也故錄之於此其碑首題名多知名士小字頗佳可
愛也治平元年三月九日書

此梁昇卿追書崔湜文湜人品殊污人齒頰而昇卿
尚追書其文何也豈唐世重佞佛湜之立精舍於御
史臺適投時好耶但昇卿分隸聲動一時東封朝覲
碑史冊稱之今觀此碑名不虛耳碑陰題侍御史并
內供奉殿中侍御史并內供奉監察御史名共六百
餘人參差不齊分書者五六十人餘皆正書書皆有法

石墨鵠華

此唐中書令崔湜為殿中侍御史日所纂蓋已入相

而後人追書之者分體嚴正自是盛唐本色

墨林快事

此書與夷齊碑結體相類唐人隸書之可觀者也

蒼

潤軒帖跋

唐自貞觀中李乾祐為御史大夫別置臺獄囚當訊
就近拘繫之其漸也侍御史東西推監察御史糾視
刑獄各禁其囚迨武后時來俊臣侯思正皆為御史
制獄之外臺獄圜扉恒滿崔隱甫總臺務言於朝掘
去於是旁列精舍以釋典懺之崔湜為文梁昇卿書

以八分開元十一年勒諸石碑陰列侍御史殿中侍御史監察御史并內供奉銜題名僅盧懷慎崔湜陸景初三人亦昇卿分書自懷慎以下正書百二十二人侍御史也自湜以下正書百八十四人殿中侍御史也自景初以下正書三百四十七人監察御史也碑額又有天寶元載以後侍御史知雜侍御史監察御史共五十人而碑之左右椎拓不及焉中有薛儉侶者二名重文碑凡三見此唐一代所僅有也昇卿

自監察御史歷殿中侍御史遷侍御史再遷太子右

庶子

曝書亭集

今在西安府儒學碑陰題名表其上格曰侍御史并
內供奉列盧懷慎等名中格曰殿中侍御史并內供
奉列崔湜等名下格曰監察御史下有一并字下缺
不全列陸景初等名其盧崔陸三人姓名並八分書
蓋梁筆也餘則正書乃後人續書之者其碑額空處
前後皆有刻前刻監察御史及姓名後刻知雜侍御

史及姓名有自天寶元載以後七字按天寶三年始
改年為載不當云元載恐是追書

金石文字記

涼州都督郭公神道碑

知運有兩碑其一張說文其一蘇頲纂知運傳載其
子二人曰英傑英乂而蘇張二公所為碑書其子四
人曰英傑英奇英協英彥而無英乂歐陽公疑焉以
謂英奇等三子在唐不顯史家闕漏尚或有之英乂
嘗為西川節度使其事甚著史官不應差其世家而

蘇張二公作銘在知運卒後不遠亦不應缺其子孫
余按代宗實錄云英又知運季子而元載所為英又
墓碑亦云隴右節度使知運公之皇考也然則英又
之為知運子無疑又按英又碑云公以天寶二載筮
仕蓋知運以開元九年卒明年立碑碑之所載諸子
皆以有名位英又幼未從仕故不載爾余又嘗得徐
浩所為英傑碑有云移孝於忠二葉四將齊名當代
同氣十人然則知運諸子碑傳缺漏者尚多不獨此

三人而已 德宗實錄又有郭英幹云英又弟也

金

石錄

濮陽卞氏墓誌

康熙二十年秋禁垣西偏中官劉進成宅掘地誤發
古墓中有瓦爐一瓦罌一墓石二方廣各一尺二寸
刻卞氏墓志四字環列十二辰相皆獸首人身一刻
誌銘而書誌作誌又無纂文人姓名第云歸于我彭
城劉公而已文稱貞元十五年歲次己卯七月朔夫

人寢疾卒於幽州薊縣以其年權窆於幽州幽都東北五里禮賢鄉之平原按懣懣有唐人舍利記二一云寺在城東門一云大燕城內地東南隅有懣忠寺門臨康衢則唐之幽州在今都城之西南合之是碑益信

曝書亭集

邠國公梁守謙功德銘

此碑右神策軍護軍中尉楊承和纂并書邠國公者內侍梁守謙也攷之唐史宦者守謙無傳惟憲宗十

五年書帝暴崩於太極殿中尉梁守謙王守澄等共
立太子殺吐突承瓘及澧王憚而韓文公平淮西碑
亦載守謙在帝左右常命之往撫蔡師夫守謙以一
宦者而爵至上公此可見憲宗之信任小人宜其晚
節不終卒死宦者之手然則余之錄此蓋將為天下
後世之戒非徒取其文字也

余薤琳琅

此宦者梁守謙造經於興唐寺而護軍中尉楊承和
為銘之書之者也書全法歐陽蘭臺方整老勁所不

及者結構小疎耳但頌宦者功德乃謂淮蔡之功十居其七將令裴李諸公何處生活

石墨鵠華

此淮蔡之役監軍內侍紀功之碑也為右監軍楊承和所纂并書者功則是已而其事不典是以文章家希言之即字頗可存而名不揚且更大誅中人之變書人姓名亦為鏟駁後之射利者以其非名筆且姓字又漫可以作偽乃指為徐浩并其文亦先從尾裴之遂不可讀予乃詳攷而得之行行改易一復其初

遂為完壁唐碑如此全美者甚少亦此字之幸逢也
墨林快事

重修孔子廟碑

此李北海邕纂而張庭珪書邕文不及書此碑是已
庭珪名書書小史謂邕文必致珪書而評者有古木
崩沙閒花映竹語觀此亦未為的然但書趙盾作趙
遁何也

石墨鐫華

此開元七年碑也李邕製文而八分即屬之張庭珪

蓋李多行恐其傷於不恪而然乎抑可見唐日之以
八分為重也張書嚴整有法不為新奇之致而鋒芒

光燄奕奕映澈

墨林快事

舊唐書張庭珪傳庭珪素與陳州刺史李邕親善屢
上表薦之邕所纂碣碑之文必請庭珪八分書之庭
珪既善楷隸甚為時人所重庭字作廷邕傳同

金石

文字記

葉有道先生碑

北海分隸固自適逸雖於漢人不無小遜而與梁昇
卿韓擇木輩逐鹿未知死誰手矣又趙明誠錄二碑
一為邕行書一為韓擇木八分書此正分書而曰邕
不知何故豈後世翻本者未見邕碑而以韓書附會
邕名耶書以俟攷

石墨鐫華

右有道先生葉公碑李邕纂并書余集古所錄李邕
書頗多最後得此碑於蔡君謨君謨善論書為余言
邕之所書此最為佳也

集古錄

此碑似經重刻乃李字之瘦勁有骨力者莫過於此而始終完全如此石者更不易得葉先生種種奇行知非虛設北海記載隱而不沒畧而不漏深得述二

氏異端之法

墨林快事

有道之子慧明孫法善三世為道士其祖若父之碑皆邕纂而書之可謂濫矣書法秀逸閑雅不見歇側之態蔡君謨謂是邕書之最佳者良然

金石文字記
補遺

承天軍城記

道士胡伯仁書 大厯元年

茅山紫陽觀法師碑

玄靜先生碑柳識纂張從申書李陽冰篆額唐世工書之士多故以書知名者難自非有以過人者不能也然而張從申以書得名於當時者何也從申每所書碑李陽冰多為之篆額時人必稱為二絕其為世所重如此余以集錄古文閱書既多故雖不能書而稱識字法從申所書棄者多矣而時錄其一二者以

名取之也夫非衆人之所稱任獨見以自信君子於是慎之故特錄之以待知者

集古錄

從申書法出二王而與李北海彷彿昔人評其書獨步江外此碑在茅山蓋唐行書之得名者

東里集

玄靜先生碑有二本一為顏魯公書一為張從申書昨余遊三茅山時見魯公碑乃方石斷裂草野而是碑板瑩然如玉壁立廡下李陽冰題額於大厯七年八月十四日建諸多為人指所畫豈以此碑世為三

絕故遂膾炙人口而知與不知皆愛耶

蒼潤軒帖跋

清河郡王李公紹功載政頌

王士則行書 永泰二年

王公此碑頗奇偉有矩矱

蒼潤軒帖跋

右成德節度使李寶臣德政碑寶臣降虜與田承嗣
革創藩鎮之禍其人本不足道碑辭脅下為諛餒
不文獨王士則者僅見陶九成書譜中不甚著而書
法遒勁瀟灑有李北海張從申之筆良可寶也碑在

真定御史行臺不易搦昨夏溫中丞如璋致一本裝

潢成帙而記於後

弁州山人稿

左金吾衛將軍臧希晏碑

碑在三原縣

右金吾衛將軍臧希晏碑朝議郎守衛尉少卿淮陽
縣開國男賜紫金魚袋韓秀弼八分書文多糝糊不
可讀所可辨者其卒以廣德二年八月五日及有懷
恪懷亮語攷懷恪碑希晏其長子也書法亦清勁可

喜其能不因開元帝之好而變者乎纂文為銀青光祿大夫行兵部侍郎清河郡開國公而缺其名當以

史証之

弇州山人稿

華岳題名

顏魯公大字正書 乾元元年

今在華岳碑之右旁王伯厚言華岳題名五百十一人再題三十一人自開元訖清泰今存者惟此與述聖頌二碑不過二十餘人而已又因地震之後以碎

石裝砌岳廟大門牆上亦有唐人題名今王無異所
搨得者通共九十二人有裴士淹李德裕李商隱名
金石文字記

唐人書法俱從右軍楔帖中各自抽繹而成如伯施
得其朗潤信本得其縝粟登善得其婉逸公權得其
雄邁泰和得其超卓陸柬之趙模則又全體脫出而
乏其神駿其不踐迹而天成者顏平原楊景度二人

耳
六硯齋

文宣王廟新脩三門記

八分書 裴孝智纂 裴平書 大歷八年 今在

曲阜 金石文字記

孔廟殘碑

正書 程浩纂 顏魯公書 今在華州

此文載唐文粹為扶風縣文宣廟記大歷二年駕部郎中程浩文而今西安府學有僧夢英書此一記其文正同但去扶風古縣也半篇其跋云此記刊石元

在湖州臨安縣夢英愛而書之豈駕部先作此於扶
風魯公又書之於湖州而去其半篇耶又攷唐地里
志臨安屬杭州不屬湖州得非夢英之誤耶今華州
有此殘碑數十字其文同

金石文字記

嵩山圓澈禪師禪林真訓

李邕書 開元十三年

鐵像頌

王端謨 蘇靈芝書 開元二十七年

石之堅不及鍤而像之尊又過於碑當其為像時豈不欲萬古長在哉寧料其後數萬斤鐵已灰滅而獨賴此一片石使今日知此地曾為魏暉之容香花之奉可以起來茲之想憶耶

墨林快事

右易州鍤像碑頌開元廿七年崇文館校書郎王端纂行易州錄事蘇靈芝書端此文多頌故太守盧暉德政詞猥旨瑣不復可解靈芝此書遒勁有逸氣然令景龍間虛和之度埽地矣宣和譜謂其行書有二

王法而成就頓放當與徐浩鴈行戈脚復類世南夫
季海誠有之以擬二王永興吾未之敢信也譜又謂
靈芝嘗為易州刺史郭明肅書侯臺記宋時墮胡中
胡人每以墨本詣權場需絹十端始易一本妬者竟
碎之今此碑幸尚完而求其所謂十絹之直理不能
得一也物完毀貴賤要自有時然亦有不可解者

弁

州山人稿

陶南村評蘇易州書謂有二王法且於徐季海鴈行

可謂知言大抵唐人書端謹有則況易州復有書名
宜趙明誠之采之也此碑傳世甚少豈以結字古朴
不入時好耶

金石評攷

蘇靈芝書余所見者幽州憫忠寺寶塔頌及是碑而
已今其石漸泐飛動之致已失遂不堪與北海對壘
此宋人搨本精采具存董尚書稱其道密宜矣冊舊
藏曹氏古林康熙壬午春忽見於花南水北之亭正
如父別故人相對古林金石表儲藏秦漢已來至五

代十國凡七百本近已散失斯碑獨為識者所得幸

矣
曝書亭集

憫忠寺塔頌

此蘇靈芝為史思明書乃唐之所不宜存其跡者易
之人傳其碑無亦以妙扎之故今觀其字奄有李顏
二家而視北海則加莊視太師又多雋誠足述也

墨

林快事

宋文惟簡北庭事實曰燕京城東壁有大寺一區名

曰憫忠唐太宗征高麗回念忠臣義士沒於王事者
建此寺為之薦福東西有兩磚塔高可十丈是安祿
山史思明所建此碑稱御史大夫史思明奉為大唐
光天大聖文武孝感皇帝敬无垢淨光寶塔頌者是
也春明夢餘錄曰此碑盖建於思明初歸附之時其
碑完好近日劉同人作帝京景物畧謂碑上半斷裂
不可讀且蘇靈芝書名甚著當時乃謂為李北海自
鐫名尤誤之甚不知北海自鐫名乃伏靈芝也此碑

書丹於石故以左為前

按舊唐書肅宗紀至德二載十二月己丑賊將偽范陽節度使史思明以其兵衆八萬與偽河東節度使高秀巖並表送降三載正月戊寅上皇御宣政殿冊皇帝尊號曰光天文武大聖孝感皇帝二月丁未大赦天下改至德三載為乾元元年今此碑建於二載十一月而已稱尊號又以大聖字移在文武之上與史書不合

宣和書譜蘇靈芝儒生也嘗為易州刺史郭明肅書
侯臺記靈芝行書有二王法而成就頓放當與徐浩
鴈行戈脚復類世南體亦善於臨仿者

余後至燕一日與鄆人萬言同至憫忠寺諦觀此碑
萬曰前行大唐光天大聖文武孝感皇帝及中間唐
字史思明字類磨去重刻者石皆凹而首行憫忠寺
上无只二字今改范陽郡三字蓋思明復叛之後磨
去之及思明誅後此地歸唐後人重刻者也當日君

臣之分殆如奕棋然非親至其下摩挲遺石而徒擲紙上之字未有能得其情者若年月尊號之先後亦從此而無疑矣

四條金石文字記

右憫忠寺寶塔頌其文張不矜纂蘇靈芝書建自唐至德二載碑稱御史大夫史思明奉為大唐光天大聖文武孝感皇帝敬无垢淨光寶塔頌宛平孫侍郎耳伯著春明夢餘錄謂碑建於思明初歸附之時而崑山顧處士寧人纂金石文字記稱嘗偕鄞人萬貞

一觀是碑其文陷處類磨治再刻以為思明復叛之後磨去及思明誅此地歸唐後人所重刻者今年冬遇貞一於諸城李渭清所遂同往觀焉碑首范陽郡三字史思明三字次行大唐等十二字文中維唐紹統及彼命啟與禪虞又東宅四水西都八川暨唐祚字至德二載字其文深陷然書法實出一人始悟侍郎處士所云猶未為定論也攷思明之降在至德二載十二月至明年正月肅宗始加尊號二月乃赦天

下改元碑既建於二載十一月不應預書尊號又思
明初附肅宗授以歸義王范陽節度使若碑於降後
宜大書王爵不當祇稱御史大夫則是碑之建蓋在
思明未降唐之先范陽三字其初本二字祿山僭稱
范陽為東都必東都也大唐一行其初必祿山父子
偽號文中唐字其初必燕字而至德二載其初必祿
山父子僭號之年無疑載攷安慶緒襲位賜思明姓
安名榮國迨既降附復更舊名因命靈芝改書者爾

碑文以左為前寧人謂書丹於石之故疑從祿山俗
尚未可定也不矜與判官耿仁智同僚思明之將復
叛也表請誅李光弼不矜實為起草辭曰陛下不為
臣誅光弼臣當自引兵就太原誅之及將入函為仁
智削去思明知之遂執二人仁智死不矜度難獨免
可知已當日思明降而復叛既誅之後唐人見其碑
踣之惟恐不力安有反勒其名於石者乎此又事之
所必無也貞一聞余言作而曰有是哉於是人摹一

本余為攷其始末書於後

曝書亭集

田仁琬德政碑

此蘇靈芝書靈芝武功人生開元天寶間書與胡霈
然齊名霈然書評者謂其格力不揚今霈然書不可
見見此碑可以得其概矣大都原出聖教而肥媚為
多尚不及王縉書王清源公碑而宣和譜擬之季海
伯施季海不足論恐伯施於地下笑人

石墨鵠華

夢真容碑

蘇靈芝行書 開元二十九年 今在塾屋縣樓觀

是年四月玄宗自言夢見玄元皇帝云有像在京城西南百餘里即命使同諸道士求得之於塾屋縣樓觀東南山阜間迎至興慶宮大同殿宰相牛仙客李

林甫拜賀

金石文字記

靈芝之字縱而有體嚴而不局最為合作蓋學褚而得其神者同時如薛稷徐浩未之或先也

墨林快事

此蘇靈芝書按碑開元帝夢老子真容求得之中南

之樓觀博州刺史李成裕奏准諸州同勒石則此碑天下皆刻之金石畧載之云未詳所在余此碑并田仁琬碑得自鄉人之守易州者或在易州今中南樓觀亦有此碑亦靈芝書文同而易州碑稱奉勅旨宰相牛仙客樓觀碑稱張九齡按碑此事在開元二十九年閏四月九齡自二十四年罷相二十五年左遷荊州長史二十八年薨未嘗生至二十九年也似當以易州碑為是樓觀碑經宋翻刻字畫不及易州三

舍豈但謬易其名姓耶

石墨鵠華

石墨鵠華論此碑在易州樓觀之異同可謂明確余
所收一本稱牛仙客不稱張九齡則此碑非樓觀所
刻也獨異真容求得之樓觀而碑刻於樓觀者有以
牛為張之誤何與余又得刻在古白鶴觀一碑先是
党光所書早已損壞漢乾祐三年楊致柔奉命重書

者

光暎識

不空禪師碑

碑徐浩書浩傳曰父嶠之善書以法授浩世狀其書
曰怒猊抉石渴驥奔泉尤為司空圖所愛又嘗論書
曰鷹隼乏彩而翰飛戾天者骨勁而氣猛也翬翟備
色而翱翔百步者肉豐而力沈也若藻曜而高翔書
之鳳凰矣可謂誇詡之極今觀此碑雖結法老勁而
微少清逸在唐書中似非其至者

石墨鵠華

顏魯公與季海同時同有能書之聲於世今顏之傳
者不下數十本而徐之存者蓋少故人知宗顏而季

海之名遂掩余經營四十餘祀始獲此紙乃手自重
裝盡發其字之精神真態然後知二家之法度情致
初似一規顏之體緊緊則乏舒揚之氣徐之體適適
則多冲夷之美徐更進一籌若通其行草分篆計之
徐不啻後矣

墨林快事

大遍覺禪師塔銘

玄奘父居西域廣釋佛言唐太宗極尊崇之據史卒
於顯慶六年即龍朔元年銘則云卒於麟德元年之

二月史云年五十六銘云年六十九先葬滙東後移徙樊川北原即少陵原文宗開成四年劉軻纂文僧建初書行草秀勁有法而文亦粗能言師事俱可存也

石墨鐫華

慈恩寺基公塋銘

李弘度纂沙門建初行書開成四年今在西安府城南興教寺

基公者尉遲敬德之從子也度為僧譯經於慈恩寺

卒於永淳中太和間始建塏李弘度銘之書者亦建
初然其筆法不無少遜玄奘塏銘

石墨錫華

窺基法師尉遲敬德之子年十八有絕力每出以三
車自隨一載醇酒精饌一載女樂十餘人一載兵器
而自與壯士錦袍花帽以騎從遇所欲留處縱飲至
醉擁女樂遍幸之而後與壯士運矛挺槊持刺自快
率以為常玄奘法師自西域取經回欲立慈恩宗旨
而難其堪授者一日請於唐文皇曰大唐國中能承

我法嗣者尉遲子耳帝命敬德令依樊剝落樊為開
示數語即盡棄其習而精研宗乘今相宗諸秘奧皆
其所披析也然性廓落不知有戒律饑則恣飡飽則
鞣睡而已一日行脚買牛肉啖之而挂其餘於錫端
至一剎乃宣律師所住也留三宿別去宣律平日受
天供不御人間食至是天供三日不至窺師行復來
宣師曰日來為粗行者腥穢所觸耶天人曰不然我
輩嶽瀆小聖耳兩日聞本剎有大乘菩薩四洲大力

神王色欲界主咸在擁護故不敢唐突今幸其行始得展敬也宣律為之三歎久之曰我不能也而奉律

益嚴

此段話記海上老僧號休如者與予夜談於龍井不知所撫出藏何函何典爾時但覺雄邁歷

落之氣可以壯人膽骨故特追而著之紫挑軒雜綴

尊勝陀羅尼經咒石幢

張少悌行書 天寶七載

今在西安府尊勝陀羅尼石幢天下多有不具載此

以少悌之名而存之

金石文字記

余所收石幢文凡十紙一張少悌書此金石文字記
謂以其名而存之者也石墨鐫華謂其書清圓秀逸
蘇靈芝輩不及曝書亭集亦稱其筆法娟秀一劉鏞
書曝書亭集有跋一僧無可書石墨鐫華稱其佳無
可俗賈姓島之從弟也寂照和尚碑是其所書為鑒
賞家所貴一趙信書一司馬簡書一高岑書一沙門
義淨譯其三無姓名書法要皆可觀

光暎識

帝廟碑

李經書 大歷二年

贈太師孔宣公碑

此崔行功纂孫庭範書行功常書開元寺千佛記者
庭範無書名而此碑分隸是唐初法亦有漢魏遺意
可與唐詔表碑同觀

石墨鵠華

碑文內升什二字升音陞什音卧隸釋漢苦縣老子
銘有什星字司隸校尉楊孟文石門頌上順什極白
石神君碑米什五錢注並云斗字

漢隸分韻升什
二字上升下斗

唐

比丘尼法琬碑天分斗極竟作升字則謬矣昔人以
其文易混故改升為斗俗作斗而二字多有誤者故
漢書食貨志治田勤謹則畝益三升不勤則損亦如
之臣瓚曰當三斗尚書帝命驗黃曰神斗博雅誤作
神升又世語姜維膽大如升誤作斗

字之从斗者漢樊毅復華下民租田口算碑斛作斛
苦縣老子銘涼州刺史魏元平碑科作斛魏受禪碑
料敵用兵料作斛王知敬李衡公碑運奇料敵作斛

歐陽通道因禪師碑斜作紆韋虛心鄭子春北岳廟
碑史惟則慶唐觀金籙齋頌魁作魁晉書孝武帝紀
論謝玄之善料軍事何超音義曰料力弔反一作料
後人不知古人書法妄改為斷而淳化閣帖晉簡文
帝書斟字作斟又於升旁加一點以別升字後周華
岳頌斟字亦同張公禮龍藏寺碑揖讓而升大寶升
字作斗以斗加一點為升則不經之甚矣

二條金石

文字記

少林寺靈運禪師碑

靈運禪師碑試大理評事崔琪謨會善寺沙門行書
而缺其名余向遊少林愛其中碑刻時值大雪命人
搦之此其一也或謂余好奇之過不知余之所得抑
亦多矣

金薤琳琅

此碑天寶九載立世言開元天寶之際文人唾地皆
成珠玉今以此碑觀之如云窮歲默坐猿對茶椀鳥
棲禪菴彼嶺雲無心即我心矣彼澗水無性即我性

矣此數語雖今之善知識不能拈出况經生哉書法
自聖教序中出是善學逸少者

蒼潤軒帖跋

今在寺中碑頂有字云寺西石塢靈運師墳即梁帝
皇嗣也以其為梁武帝之裔而稱皇嗣亦為不順其

陰刻陀羅尼經咒

金石文字記

靈運碑者唐崔琪纂末云聖善寺沙門勤下殘缺二
字當時僧書耳文淺陋不足道書法絕類聖教序無
一筆不似後世傾側偃卧以取姿態者其人材雖足

稱要之有愧於此髡也

弇州山人稿

朔方節度李光進碑

令狐楚謨 嗣子季元行書 今在榆次縣

光進與弟光顏並為唐名將憲宗平淮西光顏功最
高唐書二人並有傳光進碑令狐楚所纂光顏碑李
程所謨皆名臣也然歐趙二錄皆無此二碑歐錄所
載李光進碑楊炎謨韓秀實書者乃李光弼之弟非
光顏兄也趙錄有贈太保李良臣碑則光進之父官

止雞田州刺史初無功績以光顏故贈太保與二子
同葬一地乃趙氏錄其一而遺其二殊不可解余友
朱錫鬯過榆次趙村捐得此碑以副本遺余故得而
錄之

金石文字補遺

太保李良臣碑

正書 李宗閔纂 楊正書 長慶二年 楊正書

今在榆次縣

李良臣即李光顏之父也碑為李宗閔纂文詞爾雅

可喜宗閔牛僧孺皆一代奇才而自陷朋黨惜哉

金

石錄

良臣本河曲部落稽阿跌之族襲雞田州刺史隸朔

方軍其稱太保者以子貴贈官

曝書亭集

義陽郡王苻璘碑

右唐苻璘碑按唐書列傳璘姓苻而碑作苻以姓氏書攷之瑯琊苻氏出於魯頃公之孫公雅為秦苻節令因以為氏而武都苻氏出於有扈之後為啟所滅

奔西戎代為氏酋本姓蒲至苻堅以背有文改焉今
此碑以璘為苻氏又云其先瑯琊人皆不可知然按
璘與弟瑤皆封邑於瑯琊豈書碑者誤以苻為苻其
家出於武吏不知是正乎

金石錄

苻尚書碑字法深厚與崔太師碑同王文含自秦中
搦寄此本把玩竟日唐初諸公無不學晉即褚河南
剛正不撓千古偉人而其書亦帶有嬋娟不勝羅綺
之致蓋屈而就晉法也至誠懸始大闢境界自出手

眼雖學魯公常有出藍之譽故唐人稱其一字千金
又謂墓碣之書不出誠懸則為不孝至四夷咸知寶
重豈倖致哉近人評書者乃以晉法繩之真井蛙之
見也

銷夏記

嵩陽觀碑

聖德感應頌尚書右僕射兼右相吏部尚書晉國公
李林甫纂蓋玄宗命方士煉大還於嵩陽觀六轉而
移煉緱氏山太子廟九轉而林甫紀其瑞者也當是

時女蟲邊釁交作於中外而林甫以金石之毒發之
天下之緣督幾絕而唐事去矣而君臣方日熙熙然
交諛其美而張大之良可歎也頌成之明載太真冊
其又七載林甫歿又四載帝走蜀不知大內辟穀自
託元始孔昇真人時亦得此丹力否耶書為徐浩古
隸與帝隸法絕相類雖以肉勝亦自有態可寶也

龔

州山人稿

嵩陽觀聖德感應頌乃道士孫太冲為明皇煉丹六

轉而移緱氏山九轉而李林甫紀其瑞徐浩書其碑
者也碑作於天寶三載是時開元之政已弊而林甫
以姦佞為辭本不足採但浩分隸與史惟則輩幾欲

伯仲矣

石臺鵠華

臨淮武穆王李光弼碑

此碑顏清臣纂張少悌書少悌書在當時不大知名
而此碑殊勁拔清圓深得右軍行草遺意惜殘缺不
完且於李公中興偉畧不得一一証之唐史耳

石臺

錫華

此碑在張誼書姜嫄碑之上盛時泰借觀姚氏法書

內有此帙敬為書評歸之

蒼潤軒帖跋

姜遐斷碑

姜晞正書 碑在醴泉縣

遐者謨之孫行本之子史但附兄簡傳纂書遐碑乃
簡之子晞代簡襲行本爵為郕國公者也書法全師
登善而結體小弱碑上段已亡止有下段棄墓側余

欽定四庫全書

金石文考畧
卷十

三十一

摩而錄之 石墨鐫華

高邑縣殘碑

本願寺銅鐘銘

開元十九年 東京大福寺

原缺

纂集書

龍門山大盧舍那像龕記

水經伊水出南陽縣西東北過陸渾縣南又東北過
伊闕酈道元注昔大禹疏以通水兩山相對望之若
闕春秋之闕塞是也韋應物詩鑿山導伊流中斷若

天闕而司馬君實之言曰龍門伊闕天所為非山橫
其前水壅其流禹始鑿之然後通也斯言其信矣夫
山有八寺其一曰奉先像建自咸淳三年而以調露
二年賜額蓋闕去洛陽二十五里而近兩岸洞龕佛
像累千合夾侍坐立者幾盈萬此杜少陵詩所云氣
色皇居近金銀佛寺開也碑闕書者姓名或云袁元
哲族攷正續書之康熙戊子竹垞八十翁曩尊識

曝

書亭集

金石攷畧卷十